

# CLASSICS PART IB, LATIN LANGUAGE

## MICHAELMAS TERM, WEEK 7

### 1. Translate:

*The Latins stage an attack upon the Trojans in the absence of Aeneas.*

iamque omnis campis exercitus ibat apertis  
diues equum, diues pictai uestis et auri;  
Messapus primas acies, postrema coercent  
Tyrrhidae iuuenes, medio dux agmine Turnus:  
ceu septem surgens sedatis amnibus altus  
per tacitum Ganges aut pingui flumine Nilus  
cum refluit campis et iam se condidit alueo.  
hic subitam nigro glomerari puluere nubem  
prospiciunt Teucri ac tenebras insurgere campis.  
primus ab aduersa conclamat mole Caicus:  
'quis globus, o ciues, caligine uoluitur atra?  
ferte citi ferrum, date tela, ascendite muros,  
hostis adest, heia!' ingenti clamore per omnis  
condunt se Teucri portas et moenia complent.  
namque ita discedens praeceperat optimus armis  
Aeneas: si qua interea fortuna fuisset,  
neu struere auderent aciem neu credere campo;  
castra modo et tutos seruarent aggere muros.  
ergo etsi conferre manum pudor iraque monstrat,  
obiciunt portas tamen et praecepta facessunt,  
armatique cauis expectant turribus hostem.

**(Virgil)**

## 2. Prepare:

*Turnus gets hungry to break down the Trojan defences.*

Turnus, ut ante uolans tardum praecesserat agmen  
uiginti lectis equitum comitatus et urbi  
improuisus adest, maculis quem Thracius albis  
portat equus cristaque tegit galea aurea rubra,  
'ecquis erit mecum, iuuenes, qui primus in hostem – ?  
en,' ait et iaculum attorquens emittit in auras,  
principium pugnae, et campo sese arduus infert.  
clamorem excipiunt socii fremituque sequuntur  
horrisono; Teucrum mirantur inertia corda,  
non aequo dare se campo, non obuia ferre  
arma uiros, sed castra fouere. huc turbidus atque huc  
lustrat equo muros aditumque per auia quaerit.  
ac ueluti pleno lupo insidiatus ouili  
cum fremit ad caulas uentos perpessus et imbris  
nocte super media; tuti sub matribus agni  
balatum exercent, ille asper et improbus ira  
saeuit in absentis; collecta fatigat edendi  
ex longo rabies et siccae sanguine fauces:  
haud aliter Rutulo muros et castra tuenti  
ignescunt irae, duris dolor ossibus ardet.

**(Virgil)**